



Inatsisartunut ilaasortaq
Mala Høy Kúko, Atassut
/Maani

Tasiilami tutut pillugit § 37 naapertorlugu apeqquteqaammut 2016-283- imut akissuteqaat

Asasara Mala Høy Kúko

Ulloq 21. december 2016 Tasiilami tutut pillugit Naalakkersuisunut apeqquteqarputit.

Apeqqutit uannut akisassanngorlugit innersuunneqarput. Pinngortitaleriffik aamma Aalisarnermut Piniarnermullu Naalakkersuisoqarfik apeqqutitut akissuteqaateqarnermut ilassuteqarput.

Apeqqut 1.

Tuttunik Tasiilap eqqaani misissuisoqarnissaanik Naalakkersuisut pilersaaruteqarpat?

Tasiilap eqqaani tutunik misissuinissaq pillugu Naalakkersuisut pilersaaruteqanngillat. Pinngortitaleriffiup tutunik misissuinerani Kalaallit Nunaata kitaani uumasooqatigiit amerlasuukkaat aallunneqarput. Sipaarniarnerit pissutigalugit Pinngortitaleriffik 2012-imili tutunik kisitsisimannngilaq. Pinngortitaleriffik ilisimatitsivoq, sumiiffiit tuttoqarsinnaasutut ilimanaateqartut 2016-imi Tunumi nannunik nalunaaqutsersuinermut atatillugu timmisartumik qulaavaasimallugit. Tutunik imaluunniit tutut tumaannik takusaqartoqanngilaq. Nannunik nalunaaqutsersuineq 2017-imi ingerlanneqaqqittussaavoq, aammalu tutunik takusaqartoqassappat, Pinngortitaleriffik uumassusilinnik kingornuttakkanik misissugassanik tigusissamaarpoq.

Apeqqut 2

Tuttunik, umimmannik ukallinik tasiilap eqqaanut - kujataaniluunnii nuussisoqarnissaanik Naalakkersuisut pilersaaruteqanngillat?

Aalisarnermut Piniarnermullu Naalakkersuisoqarfiup nalunaarutigivaa “tuttunik, nannunik, ukallinik imaluunniit uumasunik allanik nuussinissaq Naalakkersuisunit pilersaarusiorneqanngitsoq. Nuussinissanik aqqissuussinerit kommunit namminneerlutik ingerlappaat, aammalu nuussinernut atasut aningaasartuutit tamarmik kommuninit akilerneqarput, ilanngullugit naasoqarneranik misissuinerit, ingerlatsinissamut pilersaarutininik suliaqarneq aamma uumasut nakorsaanut oqartussaasunik akuutitsineq”.

Brev dato:
19-01-2017
Sagsnr.
2016 - 4186
Akt. nr.
4262822

Postboks 1614
3900 Nuuk
Tlf. (+299) 34 50 00
Fax (+299) 34 54 10
E-mail: npann@nanoq.gl
www.naalakkersuisut.gl

Apeqquut 3

Tuuttut tunumiittut sumiilernerannik pinngortitaleriffimmiut ilisimasaqarpat?

Tuttut nujuitsut nujuartannngortut Tunumi sumiilersimanersut pillugu Pinngortitaleriffik paasissutissaateqanngilaq.

Apeqquut 4

Tuttut tammaaneqarmatalli paasiniarneqarnikuuppat susoqarsimaneranik?

Kalaallit Nunaata tuttui nujuartat Tasiilap eqqaaniittut siulliit ukioq 200-imiit ukioq 1200-ip missaanut sumiiffimmiippat aammalu ukioq 1200-ip aamma ukioq 1500-ip akornanni nungussimassasut ilimanarluni.

1971-imi Tasiilap eqqaani tuttuu nujuitsut katillugit 22-it inissinneqarput, tassani taakkua Ikaasaalap Itivnerata eqqaani nunamut ikaanneqarlutik. Uumasut taakkua Nuup Itivnerani (Kapisillit) tuttunit nujuitsuneersuupput.

1980-imi missingersorneqarpoq tuttuu 80-it missaanniittut Tasiilap eqqaaniittut Sermillip kangerluata kangiatungaa sinerlugu siammarsimallutik.

1998-imi aamma 1999-imi ujarassiuut Sermillip kangerluata avannamut kangiatungaani tuttuu tumaannik takusaqarput, kisianni uumasunik takusaqartoqarani.

2014-imi aamma 2016-imi Tunumi tuttunik takusaqartoqarsimasoq tusatsiakkat nutaat saqqummerput.

Apeqquut 5

Tuttut tunumiittut Tasiilap eqqaaniittut qassit missaaniinnerannik ilisimaneqarpat?

Tasiilap eqqaani tuttuu nujuitsut nujuartunngorsimasutut ilimanaateqartut amerlassusaat ilisimaneqanngilaq.

Pinngortitaleriffik 2016-imi nannunik nalunaaqutsersuinerminut atatillugu Tasiilap eqqaani timmisartumik qulaavaanermi tuttunik aamma tuttuu tumaannik takusaqanngilaq.

Apeqquut 6

Kingulliit kisitsisit qanoq taggiussippat?

Apeqquummut 4-imut akissuteqaat takuuk

Apeqquut 7

Ittoqortoormiut eqqaaniittut Umimmaat qassiunerannik pinngortitaleriffik ilisimasaqarpa?

Pinngortitaleriffiup Ittoqqortoormiit eqqaanni umimmaat amerlassusaat pillugit ilisimasaat ukiut 10-it sinnerlugit pisoqaassuseqarput.

1990-imi Kalaallit Nunaata aamma Tunup avannaanni uumasut ataatsimut katillugit amerlassusaat umimmaat 9.500 – 12.500 missaanniittut naliliisoqarpoq.

Ittoqqortoormiit eqqaannut tunngatillugu naliliisoqarpoq:

- Jameson Land, umimmaat 2950-3600 missaannik amerlassuseqartut
- Kangertiitivaq kangerlua (nunap timaani/kippasissortaani), umimmaat 1250-1550 missaannik amerlassuseqartut
- Liverpool Land kiisalu Scoresby Land, umimmaat 150 missaannik amerlassuseqartut

2000-imi apriilimi Pinngortitaleriffik Jameson Land-imi qulimiguulimmik kisitsinermik ingerlatsivoq. Umasooqatigiit umimmaat 2000-it missaanniissagatinneqarlutik naliliisoqarpoq.

2002-imi, 2003-imi aamma 2004-imi piniartut Ittoqqoortormiineersut Kangertiitivaq kangerluani nunap timaani/kippasissortaani minnerpaamik kisitsineranni Pinngortitaleriffiup ikiorpaa:

- 2002-imi umimmaat katillugit 1323-it, ilanngullugit piaqqat 191-it, takuneqarput
- 2003-imi umimmaat katillugit 463-it, ilanngullugit piaqqat 4-it, takuneqarput
- 2004-imi umimmaat katillugit 562-it, ilanngullugit piaqqat 94-it, takuneqarput

Apeqquut 8

Kingullermi qanga kisinneqarpat? Kisitsisoqarnikuuva?

Apeqquummut 7-imut akissuteqaat takuuk

Inussiarnersumik inuulluaqqusillunga

Suka K. Frederiksen